

मार्निंग डोगरी न्यूज़ बुलेटिन, समें. 09.20 Hrs

Headlines

- विदेश मंत्री डॉ. एस जयशंकर होरें एससीओ दी बैठका च आखेआ जे पैहलगाम आतंकी हमला जम्मू-कश्मीर च सैलसफा गी पछाड़ लाने दे मकसद कन्नै कीता गेदा हा ते भारत एहदे दोषिणं गी अंजाम तोड़ी पजाने तगर अराम करियै नेई बौहग।
- मुखमंत्री उमर अब्दुल्ला होरें आखेआ ऐ जे जम्मू-कश्मीर दी तरक्की ते खुशहाली लेई सेहत ते शिक्षा दो अत जरूरी थम्म न।
- जंगलात मंत्री जावेद अहमद राणा होरें टिकाऊ जंगलात प्रबंधन ते जम्मू-कश्मीर जंगलात विकास निगम दे राजस्व गी बधाने पर जोर दिता।
- अमरनाथे दी जातरा रमानदारी ते बवस्था आहले ढंगै सिर जारी, अजे तोड़ी 2 लख 34 जहार कोला मते शरदालु बर्फफानी बाबा दे दरबार च मत्था टेकी चुके देन।
- जम्मू-कश्मीर सेवा भर्ती बोर्ड JKSSB नै कैट दे अंतरिम आदेश दे बाद नायब तहसीलदार दी भर्ती प्रक्रिया गी फिलहाल रोकी दिता ऐ।

EAM SCO Pahalgam

बदेश मंत्री डॉक्टर एस. जयशंकर होरें आखेआ ऐ जे पहलगाम आतंकी हमला, जम्मू-कश्मीर दी सैलसफा सरबन्धी अर्थबवस्था गी जोफ पुजाने ते धर्म दी बिनाह् उप्पर तनोतनी पैदा करने लेई जानी-बूझियै कराया गेआ हा। कल संझां चीन दे तियानजिन च शंघाई सैहयोग संगठन परिषद गी संबोधित करदे होई डॉक्टर जयशंकर होरें आतंकवाद, अलगाववाद ते उग्रवाद गी बिंद बर्दाश्त नेई करने दी नीति अपनाने दा आह्वान कीता। संयुक्त राष्ट्र सुरक्षा परिषद आसेआ पहलगाम आतंकी हमले दी सख्त निंदेआ दा जिक्र करदे होई बदेश मंत्री होरें आखेआ जे भारत पहलगाम आतंकी हमले दे दोषियें गी न्याऽ दे दायरे हेठ आहनने दी कोशश बरोबर जारी रक्खोग। डाक्टर जयशंकर होरें शंघाई सैहयोग संगठन गी आखेआ जे ओह् आतंकवाद, अलगाववाद ते अतवाद दे खलाफ ठोस गैहीं पुट्टै कीजे इंदे कन्नै इलाकाई रमानदारी, स्थिरता ते आर्थिक तरक्की लेई सिद्धे तौर पर खतरा पैदा होंदा ऐ।

<><><><><><>

CM-MBBS

मुख्यमंत्री ओमर अब्दुल्ला होरें विकास-बाददे दे द'उं बुनियाद खेतरे - सेहत ते शिक्षा गी होर मजबूत बनाने दे अपने सरकार दे धेइये गी इक बारी फही पक्का कीता ऐ। उ'नें आखेआ ऐ जे किन्ना बी ढांचागत विकास होऐ, ओह् कदें बी मय्यारी सेहत दिक्खभाल ते शिक्षा दा विकल्प नेई होई सकदा। मुख्यमंत्री होरें एह् गल्ल स्किम्स मेडिकल कॉलेज बेमीना दे सलाना ध्याड़े आहले समारोह गी संबोधित करदे होई आखी। उ'नें डॉक्टरें गी विश्वास ते दया-भावना दे प्रतीक करार दिंदे होई युवा मेडिकल पेशेवरें गी आखेआ जे ओह् ग्रामीण इलाकें च जाइयै सेवां देन ते

सरकारी नौकरी गी इक जिम्मेदारी समझन। मुखमंत्री होरें 2019 बैच दे एमबीबीएस ग्रेजुएट्स गी सम्मानित बी कीता।

<><><><><><>

Forest-Minister Rana

जंगलात, पर्यावरण ते चपासम मंत्री जावेद अहमद राणा होरें कल सिविल सचिवालय श्रीनगर च लग्गी दी इक बैठका च जम्मू-कश्मीर जंगलात विकास निगम J.K.F.D.C दे कम्मै-काजै दा जायजा लैता। बैठक च होई दी गल्लबात दौरान टिकाऊ जंगलात प्रबंधन दे अलावा मैहकमे दे अपने संसाधनें राएं औंदन बधाने दे उपाएं बारै बी विचार बटांदरा कीता गेआ जेदे च साइंसी ढंग्गै नै ईमारती लकड़ी कड़डना, सुक्के पत्तर, डाहलियां ते होर दुइएं चीजें गी हटाने लेई साइंसी ढंग-सरिस्ते दा इस्तेमाल करना शामिल ऐ। मंत्री होरें आखेआ जे सारी प्रक्रिया गी जंगलात संरक्षण कन्नू तैहत अंजाम दिता जा। मंत्री होरें ईमारती ते बालन आहली लकड़ी सरबंधी जरूरतें गी पूरा करने दे कन्नो-कन्नी कम्म रोजगार दे मौके पैदा करने दी जरूरतें पर बी जोर दिता। जंगलात मंत्री होरें जंगलात विकास निगम गी निर्देश दिता जे इस गल्लै गी जकीनी बनाया जा कि बूहटें दी नशानदेई करने कोला लेइयै लक्कड़ दी निलामी तगर दे इक-इक कम्मै गी पूरी जिम्मेदारी कन्नै तोड़ चाढ़ेआ जा तां जे पर्यावरण सुरक्षा गी जकीनी बनांदे होई मैहकमे दे राजस्व गी बी बधाया जाई सकै।

<><><><><><>

CS-Cyber Security

मुख्य सचिव अटल डुल्लू होरें जम्मू-कश्मीर च महत्वपूर्ण ठांचे ते सरकार दिअं वेबसाइटें दी साइबर सुरक्षा दा जायजा लैने लेई कल इक चेची बैठक दी अध्यक्षता कीती। इस दौरान मुख्य सचिव होरें सब्भनं वेबसाइटें दा तैह समें दे अंदर-अंदर साइबर सुरक्षा ऑडिट कराने पर जोर दिंदे होई निर्देश जारी कीता जे एह कम्म द'ऊं म्हीने दे अंदर-अंदर पूरा होई जाना लोडचदा। एहदे अलावा उनें आम लोकें गी कुसै चाल्ली दी दिक्कत-परेशानी ते असुविधा पेश नेई आवै, एहदे लेई सब्भनं वेबसाइटें जिंदा आम जनता कन्नै मता सरोकार रौहंदा ऐ, दे बेहतर रख-रखाव पर जोर दिता। बैठक दौरान अटल डुल्लू होरें निर्देश दिता जे ओह वेबसाइटं जिंदा इस्तेमाल नेई होआरदा ते ओह बंद पेदियां न, उनेंगी हटाई दिता जा तां जे साइबर अपराधें दे खामखा बनी सकने आहले खतरें दी शेंका गी दूर कीता जाई सकै। उनें आहवान कीता जे सरकारी चिट्ठी पतरी दी सारी प्रक्रिया गी आधिकारिक ई-मेल राएं गै कीता जा ते आधिकारिक कम्में लेई इस्तेमाल कीते जाने आहले कम्प्यूटरें ते होरनं उपकरणें च सुरक्षा साफ्टवेयर लाजमी तौरा पर लाए जान तां जे सरकारी डेटा ते उपकरणें पर सुरक्षा खतरें गी घट्ट कीता जाई सकै।

<><><><><><>

Brig. Mohd Usman

महावीर चक्र कन्नै सम्मानित ते नौशैहा दे शेर खोआने आहले शहीद ब्रिगेडियर मोहम्मद उस्मान हुंदी 113मीं जयंती कल नौशैहा दी झंगड़ थाह उस्मान मेमोरियल थाह पूरी देशभक्ति दी भावना कन्नै मनाई गई। इस कार्यक्रम दा आयोजन भारती फौज ते रजौरी दे जिला इंतजामिया आसेआ सांझे तौर पर कीता गेदा हा ते एहदे च 1947-48 दी भारत-पाकिस्तान जंग

च ब्रिगेडियर उस्मान हुं'दी भूमिका पर इक दस्तावेजी फिल्म बी दस्सी गई। मुकामी विद्यार्थिं
इस मौके पर देशभक्ति दे गीत गाए।

<><><><><><>

Amarnath-Yatra

कश्मीर घाटी दे उप्परले प्हाड़ी इलाकें च बदल आहला मौसम होने दे बावजूद अमरनाथे दी
जातरा बिजन रूके पूरी चाल्ली रमानदारी ते बवस्था आहले ढंगै सिर चलै करदी ऐ ते ज्हरां
बददे शरदालु हर रोज पवित्र गुफा च मत्था टेकियै शिवें दा शीरवाद हासल करै करदे न।
आकाशवाणी दे जम्मू संवाददाता नै जानकारी दिती ऐ जे अजे तोड़ी 2 लख 34 ज्हार जातरी
बर्फानी बाबा दे दरबार च मत्था टेकी चुके दे न। तोआई सख्त सुरक्षा बंदोबस्तें हेठ अज्ज जम्मू
दे भगवती नगर आधार शिविर थमां 6 ज्हार 64 अमरनाथ श्रद्धालुएं द 15मां जत्था कश्मीर
घाटी लेई रवाना होआ। कुल 234 लौहकी-बड्डी गड्डिं दे काफिले च रवाना होए दे इस जत्थे
च 4 ज्हार 422 मर्द, 1 ज्हार 511 महिलां, 16 बच्चे, 102 साधु ते 13 साध्वियां शामिल न।
इंदे चा 2 ज्हार 471 श्रद्धालु बालटाल लेई जिसलै के 3 ज्हार 593 पहलगाम आधार शिविर
लेई रवाना होए न। इस सरबंथे च आकाशवाणी समाचार कन्नै गल्ल करदे होई किश श्रद्धालुएं
अपने बचार सांझे कीते।

<><><><><><>

JKSSB-NT

जम्मू-कश्मीर सर्विस सलैक्शन बोर्ड - जेकेएसएसबी नै राजस्व मैहकमे च नायब तैहसीलदार दी असामिएं लेई भर्ती प्रक्रिया गी अगले हुकमै तोहड़ी रोकी दिता ऐ। एह फैसला, केन्द्री प्रशासनिक ट्रिब्यूनल - कैट जम्मू आसेआ इस भर्ती प्रक्रिया लेई उर्दू भाशा गी लाज़मी कीते जाने पर रोक लाने दे मगरा लैता गेआ ऐ। ध्यानजोग ऐ जे इस भर्ती प्रक्रिया लेई उर्दू दी अनिवार्यता गी खत्म कीते जाने दी मंग मते चिरै थमां पुट्टी जा'रदी ही जेहदी पच्छोकड़ै च कैट आसेआ एह फैसला सनाया गेआ। तोआई इक अधिसूचना च जेके एसएसबी नै आखेआ ऐ जे इस भर्ती प्रक्रिया तैहत होर आवेदन मंग्गने पर अगले हुकमै तोहड़ी रोक लाई दिती गई ऐ। मेदवारें गी आखेआ गेआ ऐ जे ओह ताजा दिशा-निर्देशें लेई अजें इंतजार करन।

<><><><><><>